

嘉靖平倭祇役紀畧

第四冊 疏

嘉靖平倭祇役紀畧卷四

慈谿趙文華原實甫著

提督疏

請行疏

奏爲乞 恩再往督察亟圖滅賊事昨該臣接到浙直督撫等官胡宗憲等書揭并續到邸報各官俱奏稱賊勢重大浙直江北運道各被侵擾宗憲力防浙西夥賊僅可以守爲戰猝難成

功今彼中士民復願臣往宣布 朝廷德威以

聯屬人心鼓舞士氣臣往事不終心切冰兢自
度才能無可報答然一念忠赤圖報不欺之志
已荷蒙 聖鑒洞察況彼中事宜有諸臣力難
獨任而須臣同其利害有諸臣勢難合一而須
臣聯其彼此臣頗熟諳其情不至謬爽譬之拯
溺解懸僇力推挽期于共濟而非以爲掣肘也
臣有此至情輒敢干瀆 天聽乞 勅該部議

覆照舊容臣前往督察諸臣速驅小醜以安內地以蘇羣生其應行事件俱隨宜奏請施行事寧卽復具奏回還奉旨卿奏朕覽足見爲國恤民至意着兼都察院右副都御史提督軍務便給與勅諭等件沈良才不必去該部知道

募兵疏

題爲軍務事臣奉命前去提督各兵合威勦賊其應行軍務該部屢有題准事宜容臣至

彼臨機酌量不敢瑣瀆外謹將目今行兵大畧
請乞 明旨以便施行臣祇奉 勅命以督兵
爲務若沿途雇募烏合之眾難以驅戰反成紛
擾而遠方徵調數千里之兵急難獲濟臣訪得
京營參將左灝近年所領在京義勇約一千名
卽今情願應募合令原任守備何鳳統領又原
任總兵徐珏于琢州保定等處募有精兵一千
名合令副留守朱仁統領又河間守備朱廕原

領所部練熟民兵一千名以上官兵三千俱卽
隨臣前去其餘隨路容臣再行訪取于各兵備
道素稱有勇節制之兵不拘多寡令各該撫按
官處置餽餉差原領兵兵備將官各一員管領
隨臣分布殺賊又軍旅倥傯必須多備隨去官
員因材器使除兵部郎中郭仁奉 旨隨臣外
合用戶部屬官一員專理糧餉查得戶部郎中

陳惟舉堪以委用又工部郎中陳茂禮新補雷

州知府盧孝達原任漳州府通判黃元恭俱各
在部才識可用以上各官伏候 命下容臣帶
去分投幹理再照各地方守土之官守令至重
平日一切忘公自便及至有事卻又假公濟私
如此者眾臣今于沿途及浙直地方事干軍務
責之府州縣官幹辦如有違延卽行究治若因
而侵冒軍餉者容臣具奏追贓充餉庶人心知
警不致誤事矣奉 旨都准行該部知道

止調兵疏

題爲請節兵力以安內地事臣于本月十四日
起程前來至二十六日駐劄徐州俟各兵稍齊
卽督前進原擬該調各地方應援兵數相應奏
請以俟 上裁查該兵部題爲馳報地方緊急
倭情事議調土舍張空等土兵二千廣東兵一
萬永保土兵六千河南打手及毛葫蘆兵二千
共二萬徑往浙直總督胡宗憲處聽其調度勦

殺兩浙之賊又議調山東民兵河南睢陳兵陝
西銀兵徐沛兵各一枝又添調福建江西湖廣
山東北直隸河南兵各一枝共二萬九千徑赴
提督衙門調度會同江南北內外守備撫操等
官并力截勦江上之賊題奉 欽依咨行到臣
該臣原擬調募京營民兵一千涿州保定民兵
一千河間民兵一千共三千名爲一枝不足再
于各兵備道隨宜調用奉 旨准行該臣親閱

在京民兵有馬堪用者一百二十四名充爲前導至涿州留原任總兵徐珏選募未到至河間府知府陳大賓已同守備朱廕選到民兵一千名臣復咨行山東巡撫劉采選各道民兵有馬一千步兵二千委令參將唐玉統領未到臣今復募徐邳民兵量選堪用者候各兵齊日卽發前去到于揚州會同陳儒等議勦江上之賊務保運道無虞仍預探浙直賊勢會同督撫等官

夾勦蕩平民患以仰答 皇上簡任至意臣切
惟徵兵遠調師行糧食 國家所甚不得已故
必量賊勢緩急酌地之遠近以行徵調今賊方
猖獗若陝西銀兵河南睢陳兵恐緩不及事至
于添調福建江西湖廣山東北直隸河南兵各
一枝不無重困民力俱合停止與其遠調不如
近募可以應急而省費且無騷擾之患其河南
入衛民兵三千免其南征仍留備入衛之數山

東則旣已南征免其入衛以均勞逸尤爲便民
乞 勅兵部通行酌議應否調止早爲議覆曉
示各該撫按等官遵奉施行則力兵節而人心
安南北俱賴矣六月初七日奉 旨兵部看了
來說

賊情疏

題爲緊急賊情事先該臣于二十六日駐劄徐
州等候各兵聚齊前進已經奏 聞訖至二十

九日有馬夫耿萬自揚州走差回還口稱本月十八日齎文到于巡按衙門投遞間外面忽報賊至揚州城門俱閉聞得官兵被賊殺傷數多至二十一日萬再三告回用繩繫下走脫城外各賊不知其數三十日又據徐州知州胡麟報稱各賊自揚州至邵伯地方燒劫進窺高郵勢甚猖獗目今撫按兵備等官俱困守揚州城內兵各逃散馬被搶擄臣心切憂惶臣沿途所募

兵眾惟河間民兵一千郎中郭仁催帶同來計
一二日可齊其山東兵三千該領兵官參將唐
玉已于德州見臣稟議事後星夜赴省城整搦
各兵去訖未到臣今節聞前報緊急恨不卽滅
此賊而後朝食仍慮兵力未齊尙難展布臣于
目下多方籌畫合于附近選募今徐州見募義
勇子弟兵約一千名令參將左灝同知州胡麟
卽令前進策應又訪得泰州精銳標手頗多彼

又附近其本州知州趙祖朝素懷敵愾可用因
令遊擊曹克新前去會同趙祖朝統領標手策
應又分投差官往鳳陽滁泗等處腹裏附近地
方嚴行防守臣于一二日候河間兵至卽便星
馳隨賊向往出奇截殺制勝以慰 宵旰軫念
至意其委曲事宜茲未暇煩瀆外

通運道疏

題爲軍務事據直隸揚州府報五月十七日有

倭船一百六十餘隻在于鎮江圖山由江北登岸散漫本府河東焚劫十九日奔犯灣頭邵伯鎮等處至二十七日各賊退回江中六月初三日開往圖山下江訖又鎮江府報本月初六日丹徒丹陽地方及孟河俱各有倭船共百餘隻初七日有賊千餘登岸突至七里橋新豐鎮雲陽驛前各燒劫等因臣訪得內逆徐海自去夏王江涇敗後出洋回島率領倭眾復往漳州南